

GEORGICON IV

unde pater Tiberinus et unde Aniena fluenta
saxosusque sonans Hypanis Mysusque Caicus 370

et gemina auratus taurino cornua uultu
Eridanus, quo non alius per pinguia culta
in mare purpureum uiolentior effluit amnis.

postquam est in thalami pendentia pumice tecta
peruentum et nati fletus cognouit inanis 375

Cyrene, manibus liquidos dant ordine fontis
germanae, tonsisque ferunt mantelia uillis;
pars epulis onerant mensas et plena reponunt
pocula, Panchaeis adolescentum ignibus arae.

et mater 'cape Maeonii carchesia Bacchi:
Oceano libemus' ait. simul ipsa precatur 380

Oceanumque patrem rerum Nymphasque sorores,
centum quae siluas, centum quae flumina seruant.

ter liquido ardentem perfundit nectare Vestam,
ter flamma ad summum tecti subiecta reluxit. 385

omine quo firmans animum sic incipit ipsa:

'Est in Carpathio Neptuni gurgite uates
caeruleus Proteus, magnum qui piscibus aequor
et iuncto bipedum curru metitur equorum.

hic nunc Emathiae portus patriamque reuisit 390

Pallenen; hunc et Nymphae ueneramur et ipse
grandaeuus Nereus: nouit namque omnia uates,

quae sint, quae fuerint, quae mox uentura trahantur;
quippe ita Neptuno uisum est, immania cuius
armenta et turpis pascit sub gurgite phocas. 395

hic tibi, nate, prius uinclis capiendus, ut omnem
expediat morbi causam euentusque secundet.

nam sine ui non ulla dabit praecepta, neque illum
orando flectes; uim duram et uincula capto